



Usem Läbe vore Linge

I gniesses s Läbe, so alleini uf mim Hügeli. D Sunne schiint liebevou uf mi abe und erneueret aues. I bi eifach und das isch ou scho mi ganz Sinn. D Eifachheit isch es Instrumänt, wo viu Mönsche nid gärn spiele. Aues isch technisiert, kompliziert, durchdacht, strukturiert und perfekt gförmlert. Dür diä stränge Strukture vo usse cha d Seu vom Mönsch nümme i ihrem fiingliedrige Goud schwinge. Sie verlüürt d Abindig as Ursprüngliche. Äs erstuunt mi nüt, dass dir euch usbrönnet. Da schrisse meh Chräft a euch, aus dir chöit wandle.

D Balance machts us

Ä gsunge Ustusch zwüsche näh i gäh isch wichtig. S Läbe isch öppis Heiligs und unändlich Koschtbars. D Frag isch nur, wiä dir mit dere Koschtbarkeit weit umga. Wo und wenn ä Teil vo euch Mönsche d Wärtigkeit verlore het, weiss i nid, das isch no vor mire Zit gsi.

Gloub mir, das System, wo mir aui drinne Läbe, isch usklüeglet gnue und dr Läbesruum, wo mir hiä uf dere Ärde dörfe bruche isch da für aui. Das hiä isch s Paradies und d Natur dr Geischt vor Schöpfig. Äs git Mönsche, wo das begriffe hei und ihri Natur läbe und wärtschetze.

So viu isch i eune Häng

Vo mim Plätzli us, luegen i aube uf d Dörfli abe und due mi fescht dran erfreue, wiä flissig dir Mönsche sit. Äs git keis Gschöpf, wo mit so viune Fähigkeite und Möglicheite usgestattet isch, wie dir. Dir chöit plane, öppis erschaffe, euch entwickle und neu erfinge. Dir sit d Krönig vo dr Schöpfig. Vieles isch i eune Häng, dir träget ä grossi Verantwortig! Lueget nid zue, wiä euch diä entzoge wird. Kei Mönsch het s Rächt ä angere z ungerdrücke. Dir aui sit glichberächtigt Wäse mit ämene einzigartige Schöpfigspotenziau. Lueget zu euem Paradies!

D Wärm i im Hätz isch Goud wärt

I weiss, dass mäenge vo euch ä gueti Gsinnig het und liebevou mit em grosse Ganze umgeit. Ig weiss o, dass viu Ohnmacht da isch u nid mäenge wüerklich ä Ahnig het, wiä mä dä Verlouf vor Ärde chönnti wandle. Uf eine, wos guet meint, chöme mittlerwile siebe, wo ke Ahnig me hei, wär sie wüerklich si. Sie gseh d Schönheit vo dr Natur u dr Chraft vor Ärde nümm.

Ihri Wäerte gö verlore ire grosse graue Masse. S
Mönschsbewusstsi trüebt sich dert u d Sinne wärde
stumpf, d Seu härtet sich ab und ä inneri Chäuti entsteiht.

Mini Weisheit für di:

Länk dini Sinne uf d Schönheit vor Ärde.